

आकाशवाणी रायपुर (छत्तीसगढ़)  
प्रादेशिक समाचार (छत्तीसगढ़ी)

1810 शनिवार

25.05.2024

प्रमुख समाचार –

- 1— बेमेतरा जिला के बोरसी गांव के बारूद फैक्ट्री म बिस्फोट होय ले एक इन मनखे के मउत-छै झिन घायल- मुख्यमंत्री ह देइन जांच के आदेस।
- 2— बीजापुर जिला म इनामी समेत तैंतीस इन माओवादी मन करिन आत्मसमर्पण।
- 3— गोवंश के सुरक्षा अउ दुर्घटना ले बचाय बर राज्य सरकार लानही गोवंश अभ्यारण्य योजना।

बेमेतरा-बारूद विस्फोट

बेमेतरा जिला के बोरसी गांव म आज बिहनिया एक ठन फैक्ट्री म राखे बारूद म जोरदार विस्फोट होगे। हादसा म एक इन के मौत होगिस, उहें, छै इन आने लोगन घायल होगें, जेमन ल इलाज बर राजधानी रइपुर के आने-आने अस्पताल म भर्ती कराय गेहे।

मिले जानकारी ले बोरसी गांव के तिर पिरदा के फैक्ट्री म बिस्फोट होइस। उहां अब्बड़ इन मजदूर कारज करत रिहिन। घटना के सूचना के मिलतेचे पुलिस अउ प्रशासन के बड़का अधिकारी मनके संगे अग्निसमन सेवा अउ एसडीआरएफ के करमचारी मउका म पहुंचिन अउ राहत-बचाव कारज सुरु करिन।

उहें, कतकोन घंटा के बचाव कारज के बाद घलो मलबा म कम से कम पांच इन मजदूर के दबे के आसंका जताय जावत हे। फेर स्थानीय लोगन मन कहत हैं कि करीबन पंद्रह लोगन अभी घला मलबा म दबे हैं। फैक्ट्री प्रबंधन के डहार ले घटना के बेरा कारज करइया लोगन के सही आंकड़ा नइ दे जा सके हे। एखर सेति स्थानीय लोगन मन गुस्सागे हैं।

इही बीच, मुख्यमंत्री विष्णुदेव साय ह घटना उपर दुख जतावत दंडाधिकारी ल जांच के आदेस देइन हैं। एखर संगे घटना म मृतक के परिवार ल पांच लाख रूपिया अउ घायल मन ल पचास-पचास हजार रूपिया मुआवजा देय के घोसना करिन हैं। मुख्यमंत्री ह मउका म राहत अउ बचाव कारज के निगरानी करे बर घलो किहिन हैं।

उहें, उप मुख्यमंत्री अरुण साव अउ साजा विधायक ईश्वर साहू घलो घटनास्थल पहुंचके अधिकारी मन ले गोठबात करिन। ए बेरा उप मुख्यमंत्री अरुण साव ह घटना उपर दुख जतावत पीड़ित परिवार मन ल हरसंभव मदद करे के भरोसा देवाइन।

उहें, नेता प्रतिपक्ष चरणदास महंत ह घटना उपर दुख जतावत उच्च स्तरीय जांच अउ पीड़ित मन ल उचित मुआवजा देय के राज्य सरकार ले मांग करिन हैं।

कांग्रेस-पत्रकारवार्ता

बीजापुर के पीडिया म सुरक्षाबल अउ माओवादी मनके बीच होय मुठभेड़ उपर कांग्रेस पार्टी ह आज पत्रकारवार्ता के आयोजन करिस। जेला संबोधित करत प्रदेश कांग्रेस अध्यक्ष दीपक बैज ह ए घटना के जांच हाईकोर्ट के जज के निगरानी म कराय के मांग करिन हैं। कांग्रेस ह ग्रामीन के हवाला ले दावा करे हे कि मारे गेय सबो लोगन नक्सली नइ रिहिन, उहें, पुलिस के दावा रिहिस कि ओमन सबो इन नक्सली रिहिन। ग्रामीन मनके दावा के बाद प्रदेश कांग्रेस ह एक ठन जांच दल के गठन घलो करे रिहिस। जांच दल के संयोजक संतराम नेताम ल बनाय गिस। उहें, विधायक इंद्रशाह मंडावी, विक्रम मंडावी, जनकलाल ध्रुव, सावित्री मंडावी, रजनू नेताम, शंकर कुडियम अउ छविन्द्र कर्मा दल के सदस्य रिहिन।

बतादन कि दस मई बछर दू हजार चौबीस के बीजापुर के पीडिया म होय मुठभेड़ म बारह लोगन के मउत अउ छै लोगन घायल होय रिहिन।

उहें, झीरम के माओवादी घटना उपर दीपक बैज ह किहिन कि ए घटना म राजनीतिक षडयंत्र के दिसा म कोनो जांच नइ होइस। ओमन आरोप लगाइल कि न्यायिक जांच आयोग के कार्यकाल ल जब कांग्रेस सरकार ह बढ़ाइस अउ जांच के दायरा म घटना के षडयंत्र ल जोरिस तब तत्कालीन नेता प्रतिपक्ष धरमलाल कौशिक ह हाईकोर्ट ले स्टे लेके आ गिस।

### माओवादी-आत्मसमर्पण / मुठभेड़

बीजापुर जिला म तैंतीस इन माओवादी मन आत्मसमर्पण कर देइन। ए सबो माओवादी गंगालूर एरिया कमेटी के आरपीसी पुसनार, डुमरीपालनार म रहिके दुगोली, करका अउ हिरोली म माओवादी संगठन के आने-आने पद म सक्रिय रिहीन। जिला के पुलिस अधीक्षक अउ सीआरपीएफ के डीआईजी समेत पुलिस अधिकारी मनके आगू म माओवादी मन आत्मसमर्पण करिन हें। जेमा ले तीन इन माओवादी मन उपर पांच-पांच लाख रुपिया के इनाम रिहिस। एमा कतकोन इन माओवादी बड़का नक्सल घटना म सामिल रिहिन। आत्मसमर्पित माओवादी मन ल राज्य सरकार डहार ले पुनर्वास नीति के तहत पचीस-पचीस हजार रुपिया के प्रोत्साहन रासि दे गिस।

उहें, सुकमा जिला के कौंटा के किद्रेलपाड़ इलाका म सुरक्षाबल अउ माओवादी मनके बीच मुठभेड़ होइस। पुलिस ह ए मुठभेड़ म कतकोन माओवादी मनके घायल होय के दावा करे हे।

ओति, बीजापुर जिला के मिरतुर थाना क्षेत्र के जप्पेमरका अउ कमकानार के जंगल म घलो सुरक्षाबल अउ माओवादी मनके मुठभेड़ होइस। जेखर बाद जवान मन घटनास्थल के तलासी लेवत हें।

### मतगणना तैयारी-दौरा

देसभर समेत कौंडागांव म घलो चार जून के होवइया मतगणना के तियारी जोरसोर ले चलत हे। अतिरिक्त मुख्य निर्वाचन पदाधिकारी निलेश कुमार महादेव क्षीरसागर ह कौंडागांव के सहीद गुण्डाधुर शासकीय स्नातकोत्तर महाविद्यालय म मतगणना केंद्र के निरीक्षण करिन। ए बेरा ओमन विधानसभावार मतगणना कक्ष, उम्मीदवार अउ गणना अभिकर्ता मनके बड़क बेवस्था, प्रवेस पास, सीसीटीवी कैमरा समेत आने बेवस्था मन के जानकारी लिन। उंखर संग जिला निर्वाचन अधिकारी अउ कलेक्टर कुणाल दुदावत समेत कतकोन अधिकारी मौजूद रिहिन।

### आरटीई-राशि भुगतान

राज्य सरकार ह निजी स्कूल मन ल निसुल्क अउ अनिवार्य बाल शिक्षा अधिकार अधिनियम-आरटीई के तहत बछर 2022-23 बर एक सौ चौतीस करोड़ तीस लाख रुपिया ले जादा के रासि जारी कर देहे। उहें, बांचे रासि करीबन सत्तर करोड़ रुपिया के भुगतान के कार्यवाही प्रक्रिया म हे। लोक शिक्षण संचालनालय ह किहिस कि स्कूल मन डहार ले बेरा म दावा आपत्ति करे के बाद सुल्क रासि के भुगतान करे जाही।

लोक शिक्षण संचालनालय ह स्पष्ट कर देय हे कि आरटीई के तहत निजी स्कूल मन ल सुल्क के करीबन 285 करोड़ रुपिया के रासि लंबित होय के समाचार गलत हे।

### गोवंश अभ्यारण्य योजना

सड़क रद्दा म खुल्ला किंजरत गाय-गरू के सुरक्षा अउ दुर्घटना उपर रोक लगाय बर राज्य सरकार ह प्रदेस म गोवंश अभ्यारण्य योजना लानही। मुख्यमंत्री विष्णुदेव साय ह अधिकारी मन ल एखर सेति कार्ययोजना बनाय के निरदेस देइन हें।

राज्य म पसुधन विकास विभाग, पंचायत, राजस्व अउ वन विभाग के समन्वय ले गोवंश अभ्यारण्य संचालित करे के योजना हे। एखर ले सड़क-रद्दा म भूखे-प्यासे भटकइया गोवंश ल रोज्जे न सिरिफ चारा मिल सकही, भलूक उंखर देखभाल घलो बने ढंग ले होही।

### जैविक खेती-कार्यशाला

जैविक खेती के जागरूकता बर शाक वाटिका कार्यशाला के आयोजन काली राजधानी रइपुर म करे जाही। ए कार्यशाला म घर के बारी अउ छत म साग-भाजी उगाय के जानकारी देय जाही। ए प्रसिक्षण मुफत म होही, जेखर बर पहिली ले पंजीयन कराना होही। ए कार्यशाला म केंद्रीय प्रसिक्षण परमुख के.ई.एन. राघवन मौजूद रइहीं।

### हेलमेट बैंक

बिलासपुर पुलिस ह सड़क दुर्घटना म होवइया मउत के सेति चकरभाठा थाना म प्रदेस के पहिली हेलमेट बैंक के सुरुआत करे हे। ए मउका म पुलिस अधीक्षक ह किहिन कि अब कोनो घलो मनखे यात्रा के बेरा ए बैंक म अपन परिचय पत्र देखाके हेलमेट ले सकत हे, अउ हेलमेट ल चौबीस घंटा के भीतर लहूटाना होही। जेखर बर ओमन ले कोनो सुल्क नइ ले जाही।

### यूपीएससी-मॉक टेस्ट

रइपुर जिला प्रशासन के डहार ले संघ लोकसेवा आयोग माने यूपीएससी के प्रारंभिक परीक्षा-2024 बर काली निसुल्क मॉक टेस्ट के आयोजन करे जाही। एखर बर 485 प्रतिभागी मन पंजीयन कराय हैं। ए परीक्षा दू पारी म होही। युवा मन ल वास्तविक परीक्षा के अनुभव कराय बर ऑनलाइन के जघा ऑफलाइन मॉक टेस्ट ले जावत हे। एखर प्रश्नपत्र हिन्दी अउ अंग्रेजी भाषा म होही। जिला प्रशासन डहार ले मॉक टेस्ट के बाद प्रश्न के विस्तार ले उत्तर दे जाही। संगे पहिली तीन स्थान पवइया प्रतिभागी मन ल इनाम घलो दे जाही।

\*\*\*\*\*  
\*\*\*\*\*